

ედმუნდ ფრიკის როლი ფოთის არქიტექტურული სახის შექმნაში

ფოთი-ქალაქის ტრანსფორმაცია, ნიკო ნიკოლაძისა და გერმანელ არქიტექტორ ედმუნდ ფრიკის კოლაბორაციასთან არის დაკავშირებული. მათი მოღვაწეობის პერიოდში ფოთი ევროპული ტიპის ბურჟუაზიულ ქალაქად იქცა. ფრიკმა ნიკოლაძესთან ერთად ქალაქის გენგეგმა პარიზის ბულვარის მიხედვით დააპროექტა. მისი პროექტების უმრავლესობა ფოთში მოდერნის სტილის ნამუშევრებს განეკუთვნება, ისინი წარმოადგენენ ცვალებადი სიმაღლის მქონე შენობებს, რომლებიც განსხვავებული დეკორატიული ელემენტების მიუხედავად, საერთო სახეს ატარებენ. ისინი დღემდე ამშვენებენ ქალაქის იერსახეს. წარმოგიდგინოთ რამოდენიმე მათგანს: ფოთის ისტორიის მუზეუმი, რომელიც მდებარეობს 26 მაისის ქუჩაზე. შენობა აგებულია ნიკო ნიკოლაძის პერიოდში და წარმოადგენდა ვინმე ვაჭრის ომერ ავგენინოს საცხოვრებელ სალხს. გ.ჭანტურიას, ყოფილი ლევაშოვის N5, ყრუ-მუნჯთა საზოგადოების შენობა, თავდაპირველად ს. მიქიაშვილის სასტუმრო “გრანდოტელი”. მთავარი ფასადის ფოტო და პროექტი. ეს კონკრეტული შენობა კულტურული მემკვიდრეობის ძეგლების ნუსხაშია და დღესდღეობით ინგრევა. ის დეკორატიული და მხატვრული ელემენტებით ხასიათდება და 1907 წელს არის აშენებული. თითქმის ნანგრევებად ქცეული შენობის პირველ სართულზე ამჟამად მანქანების პროფილაქტიკა და საწყობია. შენობას მესაკუთრე "სასწავლო საწარმოო წამოწყება ფოთის ყრუ-მუნჯთა საზოგადოება" ყიდის. აზრა წარწერით - „იყიდება“ აივანზე დიდი ხანია გაკრულია. ასევე ინგრევა მეორე კულტურული მემკვიდრეობის ძეგლის სტატუსის მქონე, მოდერნის სტილში აშენებული შენობაც, სადაც წლების განმავლობაში სახელმწიფო უშიშროება იყო განთავსებული. ნაგებობა წითელი აგურით და კირქვითაა აშენებული და სხვადასხვა არქიტექტურული დეტალებით, კონფიგურაციებით, დეკორატიული და მხატვრული ელემენტებით გამოირჩევა. ამჟამად შენობა ავარიულია და მხოლოდ გარე ფასადია შენარჩუნებული. შენობის შიგნით კი დანგრეულია კედლები, იატაკი, სახურავი, კიბე. ფოთის ადგილობრივ ხელისუფლებაში განმარტავენ, რომ შენობა კერძო საკუთრებაა და მისი მოვლა-პატრონობა მათ არ ევალებათ, მაგრამ საქართველოს “კანონი კულტურული მემკვიდრეობის შესახებ“, ხელისუფლებას, იურიდიულ და კერძო პირს ერთნაირად ავალდებულებს კულტურული მემკვიდრეობის ძეგლის სტატუსის მქონე შენობის მოვლა-პატრონობას და მისი იერსახის შენარჩუნებას... როგორც მოყვანილ მაგალითებში ვხედავთ აქტიურად მოღვაწე ედმუნდ ფრიკი, თავის ყველა პროექტში სრულ შემოქმედებით ფანტაზიას ავლენს, არასოდეს მეორდება და ამასთან, აქვს სრულიად თვითმყოფადი, ჩამოყალიბებული ხელწერა. მან გერმანული ტრადიციები მოარგო ადგილობრივს, მოდერნის სტილის ელემენტების გამოყენებით. ცნობილია რომ ეს სტილი პოპულარულობით სარგებლობდა XIX საუკუნის ბოლოს. ის დამოუკიდებელი, მაგრამ “არაზღვარგადასული” მხატვრული ფორმებით ხასიათდება. მოდერნის ყველა ნაგებობა ერთმანეთისგან გასხვავებულია, როგორც გეგმარებით, ასევე ფასადების არქიტექტურულ-მხატვრული სახის გადაწყვეტის მხრივ. თითოეული ავტორი სრულიად თავისუფალია ყოველი ახალი ნაგებობის პროექტირებისას.

სტილისტური თვალსაზრისით ბევრი პარალელის გავლება შეიძლება ფრიკის ნამუშევრებსა და XIX საუკუნის ბოლოსა და XX საუკუნის დასაწყისში თბილისში მოღვაწე გერმანელი არქიტექტორების მიერ აშენებულ ნაგებობებსა და კოლონისტების სახლებს შორის. სწორედ ტრადიციების შერწყმა და ურბანული მთლიანობა იყო მათი ხელწერის მთვარი დამახასიათებელი ნიშანი, რასაც ფრიკი თავისი ნამუშევრებით ფოთის არქიტექტურაში თვალნათლად გვაჩვენებს. სამწუხაროა რომ მისი ნამუშევრების უმრავლესობა მიტოვებული, მოუვლელი და დანგრევის პირას არის მისული, რაც ძალიან დასანანია, რადგან საინტერესოა გერმანელი არქიტექტორის შემოქმედების გულდასმით შესწავლა და კვლევა, რომელიც ასე ძალიან იყო შეყვარებული საქართველოზე.